

# АКАФИСТ СВЯТЫМ МУЧЕНИЦАМ ВЕРЕ, НАДЕЖДЕ И ЛЮБОВИ, И МАТЕРИ ИХ СОФИИ

## Кондак 1

Избранным рабам Господа Вседержителя, Вере, Надежде и Любви, и мудрей матери Софии, похвальная вам пения умиленно возносим. Вы же, яко дерзновение ко Христу Богу имуще, молитесь за ны, во еже избавитися нам грехов и скорбей, да благодарственно вопием вам: Радуйтесь, Веро, Надеждо и Любы, купно с Софиею, материю вашею премудрою!

## Икос 1

Ангелы на Небеси радовахуся, добродетельное житие ваше зряще, еже провождаете в чтении Писаний Божественных, в трудех, посте, молитве и милостыни, материю вашу непрестанно суща поучаеми, да явитесь образи живии триех богословских добродетелей, ихже именами наречены бысте. Мы же, таковой мудрости матери вашей и совершенному благоразумию вашему дивящеся, благоговейно рцем вам: Радуйтесь, единомысленныя сестры, трием добродетелем тезоименитыя; радуйтесь, в повиновении богомудрей матери вашей на степени совершенствования вшедшия. Радуйся, аки три райския ветви, в зловернем Риме возрасшия; радуйся, Софие, дочерем твоим имена добродетелей нарекшая, яже вещью исполняти научила еси. Радуйся, Веро, верою невидимое, яко видимое, зрети нам помогающая; радуйся, в нетление облеченная. Радуйся, Надеждо, надеждою страдания наша во юдоли скорби ослабляющая и в горняя десницею указующая; радуйся, Царствие Небесное унаследовавшая. Радуйся, Любы, любовию Божественною блаженство бессмертныя жизни нам открывающая; радуйся, благодатию Духа Святаго осиянная. Радуйся, Софие, си есть премудрость, премудре дщери твоя воспитавшая; радуйся, в добродетелех веры, надежды и любве нас утверждающая. Радуйтесь, Веро, Надеждо и Любы, купно с Софиею, материю вашею премудрою!

## Кондак 2

Видящи мудрая София слуги, пришедша звати ю со дщерьми ко царю Адриану, и познавши вину призвания своего, ста со чады своими на молитву, помощи Бога просящи: по молитве же, емшеся за руче, якоже венец уплетенный, идяху вкупе, поюще Христу Богу: Аллилуиа.

## Икос 2

Разум несумненный имели есте, святыя, егда бо в палаты царския введены бысте, царице Адриану предстаете с лицом светлым, очесы веселыми и

сердцем мужественным. Царь же, зря честная лица ваша неустрашенна и мудрость Софии уведев, отложи на ино время суд свой и отсла вы к некоей благородней жене, у неяже пребысте три дни, матери вашей премудрей Богодуховенными словесы день и ночь вас поучающей. Темже ублажающе вас, взываем сице: Радуйтесь, три непорочныя агницы Христовы, венец добродетелей в себе совокупившия; радуйтесь, три добродетельныя сестры, твердую веру, несумненную надежду и нелицемерную любовь ко Господу Богу явившия. Радуйтесь, не пощадевшия красоты и младости ваша, Краснейшаго ради добротою паче сынов человеческих; радуйся, Софие, чада твоя возлюбленная на подвиг мученическ за Христа наставлявшая. Радуйся, Веро, мучением за Христа веру твою исповедавшая; радуйся, сестры твоя крепкою верою воздвизавшая. Радуйся, Надеждо, твердое надеяние на Христа возлагавшая; радуйся, сестры твоя неослабною надеждою укреплявшая. Радуйся, Любы, муками за Христа любовь твою действенную показавшая; радуйся, сестры твоя огнем любве ограждавшая. Радуйся, Софие, сладкая чада твоя увещававшая презрети славу и богатство и всю сладость мира сего тленнаго; радуйся, добрыя дщери твоя до крове стати за Господа и умрети за Него усердно учившая. Радуйтесь, Веро, Надеждо и Любы, купно с Софиею, материю вашу премудрою!

### **Кондак 3**

Силою Божественною осенени бяху мученицы, яже добродетели имен своих явиша делом в подвизех мученических, воспевающе Богу: Аллилуиа.

### **Икос 3**

Имуще в себе святыя мученицы столп веры, криле надежды и огонь любве, в сладость послушающия от словес матере своея, едина другую в долготерпении утверждаху и радостно идяху, желающе честнаго мученичества, еже за Христа. Тому поклоняющесе, яко Богу нашему, сицевыми вас воззваньми почитаем: Радуйтесь, ни мало не поскорбевшия о лишении временнаго сего живота вечныя ради жизни; радуйтесь, чести ради Христовы плоть на муки предавшии. Радуйтесь, три многоценныя сосуды веры, надежды и любве Богу в дар принесшия; радуйся, Софие, яко, любве ради презельныя ко дщери твоим, всем сердцем возжелела еси, да Царствие Божие наследуют. Радуйся, Веро, души наша верою озаряющая; радуйся, к тихому пристанищу нас возносящая. Радуйся, Надеждо, сердца наша сладостию надежды оживляющая; радуйся, из пучины отчаяния нас извлекающая. Радуйся, Любы, страдания и скорби наша в радость прелагающая; радуйся, окамененная сердца наша во умиление преводящая. Радуйся, Софие, мудростию на благое нас наставляющая; радуйся, потемненное око душ наших просвещающая. Радуйтесь, Веро, Надеждо и Любы, купно с Софиею, материю вашу премудрою!

#### **Кондак 4**

Буря ярости мучителей нападе на тя, святая Веро, но не поколеба тя: кто бо возможет веру неодолимую подвигнуть, адаманта крепчайшую, яже верных научила есть пети с тобою Богу: Аллилуиа.

#### **Икос 4**

Слышащи мудрая мати дщери своя пред царем небоязненно Христа исповедающая, и глаголющая, яко тою единого желают, еже бы страдати и терпети горкия муки Сладкаго ради Иисуса Христа, радовашеся вельми и моляще Бога, да укрепит я в предлежащих муках. Сие убо изволение похваляюще, первойшей дщери мудрыя матере тако воспоем: Радуйся, Веро, немилосердая биения Сладчайшаго ради Иисуса сладце приемшая; радуйся, урезанная сосца твоя, аки два крина чистоты, в жертву Господу принесшая. Радуйся, яко от язвы твоя вместо крове млеко истече; радуйся, яко на раскаленное железо положена была еси. Радуйся, яко в коноб кипящ ввержена сущи, ни мало не опалилася еси, ниже вредилася еси; радуйся, страстей наших небесною прохладю утишающая. Радуйся, огонь мучений наших в болезнях угашающая; радуйся, знамение веры посреде напастей нас знаменующая. Радуйся, щитом веры во брани со врагом нас покрывающая; радуйся, честную главу твою за Главу Церкви, Христа Бога, под меч радостно преклоншая. Радуйся, яко обагрением крове твоя, аки червленицею, одеяна, явилася еси очесем Безсмертнаго Жениха твоего: радуйся, к желанному краю пришедшая и любимаго Спаса и Господа узревшая.

#### **Кондак 5**

Богоданным звездам уподобилися есте, Веро, Надеждо и Любы, всем бо сердцем прилепившася ко единому вечному животу и красоте неизреченней, Иисусу Христу, скоро шествовасте, во еже умерети за Него и насладитися Божественнаго Его видения, поюще Ему: Аллилуиа.

#### **Икос 5**

Видевше добропобедныя сестры святую Веру радостно за Христа пострадавшу, и сами хотяху души своя за Него положити: царь же Надежду святую начат испытovati, и видев ю с сестрою единомысленну сущу, на муки вдаде ю, обаче ничтоже успе. Мы же, Надежду святую о сицевом ея мудровании ублажающе, воспоем и прославим ю: Радуйся, Надеждо, жестоко биенная, обаче пресветлую надежду на Господа не потерявшая; радуйся, муки твоя безропотно в молчании терпевшая. Радуйся, и нам крепкое терпение подающая; радуйся, яко в разжженной печи неопалема бывши, хвалу Богу возсылала еси. Радуйся, яко и нас во страданиях хвалити Бога науча-еши; радуйся, яко ноггми железными строгана была еси. Радуйся, нас, сущих в скорбех, лучами надежды осиявающая; радуйся, яко чудное некое благоуха-

ние от язв твоих исхождаше. Радуйся, непоколебимое упование на Господа Иисуса неизменно сохраняющая; радуйся, безнадежность и бессилие в сердцах наших истребляющая. Радуйся, вечное посещение за Христа радостно принимая; радуйся, ясная денница, нам, печальми земными угнетенным, мир вечный раскрывающая. Радуйтесь, Веро, Надеждо и Любы, купно с Софиєю, материю вашу премудрою!

### **Кондак 6**

Проповедником и Апостолом Богоносным подобны бысте, богомудрыя сестры: добродетельми бо вашими проповедасте всем верным веру, надежду и любовь ко Господу, Владыце всех,. Тому поюще: Аллилуиа.

### **Икос 6**

Возсияла еси, аки солнце, Любы святая, кто бо сице за возлюбленнаго Господа своего можаше стати, якоже Любы, понеже писано есть: крепка яко смерть любви, вода многа не может угасити любви, и реки не потопят ея. Молим ти ся ныне, Любы святая, серафимским пламенем любви ко Господу горящая, обнови окамененная и усохшая сердца наша, возжги в нас, оскудевших любовью, свет любви, да возлюбльше Господа и вся ближняя наша, тебе яко молитвенницу нашу, восхвалим сице: Радуйся, Любы, яко любви твоя ко Христу води многи прелестей мирских не угасиша; радуйся, яко вся ласкания и дары царицы отвергши, душу твою за Господа положила еси. Радуйся, яко любви твоя реки бед и страданий не потопиша; радуйся, за Господа Иисуса на колеси протягнутая, жезлием биенная, свердлами прободенная и в пещь огненную вверженная. Радуйся, яко в лютых муках твоих силою Божию укрепляема была еси; радуйся, кровию твоею, любви ради Безсмертному Жениху твоему Христу излианною, в хладных сердцах наших любовь возбуждающая. Радуйся, яже показавшая нам, яко любви ради вся мучения сладце претерпеваются; радуйся, явившая нам, яко любви Божественная приводит к животу вечному. Радуйся, самую вещь уверившая, яко любви Божественная откровение есть бессмертия; радуйся, яко никакоже мучительства возмогоша разлучити Любовь от любви Христовы. Радуйся, в муках апостольски вещавшая, яко не разлучит тя от любви Божия ни скорбь, ни теснота, ни гонение, ни глад, ни нагота, ни беда, ни меч; радуйся, любви ради Христовы мечем во главу усеченная. Радуйтесь, Веро, Надеждо и Любы, купно с Софиєю, материю вашу премудрою!

### **Кондак 7**

Хотяще скорее от тела разлучитися и со Христом быти святая дева, егда на вечное посещение идяшу, едина другую и мать свою Софию объемлюще лобызахуся, дружескому нас люблению поучающе, да вси купно поем Богу: Аллилуиа.

### Икос 7

Новое чудо показа Господь, егда помощь свою посла страдавшим за исповедание имене Его толико юным девам: верою бо, надеждою и любовию укрепляеми и возносими бывше, доблественне подвиги своя скончаша. Мы же в единомыслии и единомушии до конца живота пребывших молим вас, да и нам низпослете единомыслие в совершении добрых дел, умиленно величающим вас: Радуйтесь, Веро, Надеждо и Любы, едином путем мучений до врат небесных шедшия; радуйтесь, в пресветлый чертог прелюбезнаго Жениха вашего во глазе радования вшедшия. Радуйтесь, яко Иисус Христос просвети, якоже звезды на небеси, раны на телесех ваших; радуйся, Софие, доблественне на муки чад твоих взиравшая. Радуйтесь, яко небесною красотою, еяже око не виде, украси Господь доброту вашу, муками отъятую; радуйтесь, венцы воздаяния приемшия. Радуйтесь, аки три звезды, Солнцем правды озаренныя; радуйся, Софие, в мужественном исповедании дщерьми твоими имене Христова утешение велие обретшая. Радуйтесь, мглу сомнений наших рассеивающия; радуйтесь, нас удрученных страданьми душевными и телесными, подкрепляющия. Радуйтесь, красотою любве сердца наша украшающия; радуйся, Софие, крепосте и утешении изнемогающих в бедах и нуждах. Радуйтесь, Веро, Надеждо и Любы, купно с Софиею, материю вашею премудрою!

### Кондак 8

Странное и непонятное нам немощным, в мирских сластех погрязнувшим, зрим дело, яко София святая возлюбленных чад своих видящи лютыя и горькия муки и смерти, ни мало не поскорбе, но возрадовася зело духом, поющи Богу: Аллилуиа.

### Икос 8

Вся бе в вышних мудрая София, егда дщери своя сладкими словесы и мудрыми увещаньми на мучения подвизаше. Аще же от естества к слезам преклоняшеся абие, от любве Христовы прелагашеся на радость, печаль бо сердечную болезнь о чадах матернюю победи в ней любви Божия. Велиею убо любовию дщери своя любящи, паче всею тем Царствия Небеснаго желаше. Сею ради, чудящеся мудрости и велицей любви твоей ко дщерем и славящеся, взываем: Радуйся, Софие, яко возвеселися душа твоя о блаженней кончине дщерей твоих, святое имя Господа дерзновенно исповедавших; радуйся, в мученичестем венчании чад твоих честь и славу приявшая. Радуйся, участия мученическаго и спребывания со дщерьми в небесней славе Христа Бога сподобльшаяся; радуйся, честная телеса дщерей твоих с радостными слезами погребшая. Радуйся, три дни гробу их приседевшая и сном смерти о Господе почившая; радуйся, аще и не плотию, обаче сердцем за Христа страдавшая. Радуйся, яко три добродетельныя дщери, сими веру, надежду, любовь к Богу

явивши, в дар Пресвятой Троице принесла еси; радуйся, яко чадородия ради спаслася еси. Радуйся, дивная мати, благия памяти достойная; радуйся, дщери твоя, да кровь твою за Христа пролиют, молившая. Радуйся, умудряющая ны, да блюдем непреложно добродетели веры, надежды и любви; радуйся, Животворящей Троице за ны молящаяся. Радуйтесь, Веро, Надеждо и Любы, купно с Софиєю, материю вашу премудрою!

### **Кондак 9**

Вси Ангели дивляхуся о страданиях ваших, святые мученицы, и победу вашу над диаволом торжествуяще, души же ваша к небеси провождающе, воспеваху Христу Богу: Аллилуиа.

### **Икос 9**

Витии велеречивии вся страдания ваша за Христа не возмогут изрещи, дивящиеся же толиким подвигом, во младых летех подъятым, немощствуют. Мы же о честней кончине вашей Бога прославляюще, величаем вас сице: Радуйся, Веро, Надеждо и Любы, поющая хвалу Богу, на небо небесе возшедшему; радуйтесь, щите веры, броне надежды и светильниче любви. Радуйтесь, зрением пресветлаго лица Божия наслаждающиеся; радуйся, Софие, благочестивыя матери на мудрое воспитание чад их наставляющая. Радуйтесь, поучающие ны, да взыщем Господа, и жива будет душа наша; радуйтесь, с верою, надеждою и любовью прибегающих к вам теплыя молитвенницы. Радуйтесь, вразумляющие ны, яко вся сладость и прелесть мира сего яко дым исчезает, яко прах от ветра разметается и в персть обращается; радуйся, Софие, по сердцем Господа Бога возлюбльшая. Радуйтесь, аки три светлии ключи, ко единому источнику жизни притекшии; радуйтесь, аки три благовоннии цветы, на единой благоплодной ветви прозябшии. Радуйтесь, аки три зеркала, безпредельную красоту Божию в себе отражающая; радуйся, Софие, аки маслина, три ветви, отягченныя изобильными плоды даров Божиих, произрастшая. Радуйтесь, Веро, Надеждо и Любы, купно с Софиєю, материю вашу премудрою!

### **Кондак 10**

Спаси хотяще души своя святые мученицы, любви ради Христовы ласкания царева и богатства мира сего тленнаго презреша и радостно кончину мученическую за Христа прияша, поюще Ему: Аллилуиа.

### **Икос 10**

Стенами веры, надежды и любви являются святые мученицы всем, прибегающим к ним с теплою и усердною молитвою, и сице в печалех и напастех к ним взывающим: Радуйтесь, язв греховных добрыя целительницы; радуйтесь, во тме печали наша светом упования ны озаряющая. Радуйтесь,

посреде напастей и скорбей дивный покой нам посылающая; радуйся, Софие, о нас, в злостраданиях поверженных, мудрое попечение являющая. Радуйся, Веро, крест спасения пред нами воздвизающая, радуйся, немощи наша по молитвам к тебе исцеляющая. Радуйся, Надеждо, якорь избавления нам подающая; радуйся, уныние сердец наших благостно отъемлющая. Радуйся, Любы, твоим ко Господу ходатайством в злей напасти от нечаянныя смерти ны ограждающая; радуйся, изнемогающия силы наша на бодрость возставляющая. Радуйся, Софие, прилежная о нас к Богу молитвеннице; радуйся, в добрых делах наших мудрая наставнице. Радуйтесь, Веро, Надеждо и Любы, купно с Софиею, материю вашею премудрою!

### **Кондак 11**

Пение сие похвальное, аще бы и тмочисленное приношахом вам святыя мученицы, не бы довлело ко прославлению добродетелей и подвигов ваших: обаче хвалу Богу возсылающе за вся, яже во святых Своих нам являет, Тому поем: Аллилуиа.

### **Икос 11**

Светом небесным пред Господем горящим свещам подобны Вера, Надежда и Любы, купно с материю их Софиею, к нимже припадаем, моляще, да просветят ны, омраченныя печальми и из глубины сердец зовущия: Радуйтесь, ризы ваша в крови Агнчи на земли убелившия; радуйтесь, живота вечнаго нам ходатаицы. Радуйтесь, душ, ищущих покоя в милосердии Божии, утверждение и хранение; радуйся, Софие, от суеты мирския ны ограждающая. Радуйся, Веро, доброценная кадильнице, фимиам хвалы Богу возносящая; радуйся, нас грешных верою просвещающая. Радуйся, Надеждо, в скорби утешение и прибежище наше; радуйся, в печалех наших лучезарная вестнице избавления. Радуйся, Любы, незлобие и кротость в сердца наша вливающая; радуйся, таинственная звездо, от тесноты земныя горе ны возносящая. Радуйся, Софие, мудрая и пречестная детоводительнице; радуйся, богомудраго жития молящимся ти устроительнице. Радуйтесь, Веро, Надеждо и Любы, купно с Софиею, материю вашею премудрою!

### **Кондак 12**

Благодать Божию прияти сподобившиися молите о нас, святыя мученицы, Пречистаго Владыку Христа, да милостив будет к нам грешным, с верою, надеждою и любовью к Нему Единому, Господу и Спасу нашему, смиренно поющим: Аллилуиа.

### **Икос 12**

Поем ваша крепкия подвиги, верою, надеждою и любовью проникновенныя, почитаем страдания ваша презельная, хвалим дивное терпение ваше,

ублажаем кончину, за Христа вами радостно подъятую, величаем необоримое мужество ваше, святые мученицы Веро, Надеждо и Любы, и мудрая мати Софие, и прославляюще вас, взываем сице: Радуйтесь, аки три струи молниины, от восток даже до запад добродетельми своими просиявшия; радуйтесь, фиали веры, надежды и любви, животворным питием души наша напаяющи. Радуйтесь, трие светозарнии путие, ко престолу славы Господни нас ведущии; радуйся, Софие, чадо ради твоих от лика святых похваленная. Радуйся, Веро, цвете веры, паче снега белейший; радуйся, услаждение страждущих. Радуйся, Надеждо, угнетенных сердец возношение; радуйся, аки поток цельбоносный, жажду скорбящих утоляющая. Радуйся, Любы, венче из мира, радования и благодати соплетенный; радуйся, умная зарнице вечности. Радуйся, Софие, жезле силы, кротце и мудре чада наказуй; радуйся, Боговедения пресветлая луче, душам нашим возсияющая. Радуйтесь, Веро, Надеждо и Любы, купно с Софиею, материю вашею премудрою!

### **Кондак 13**

О святые и достохвальныя мученицы, Веро, Надеждо и Любы, и мудрая мати Софие, ныне приемше малое сие моление наше, от всяких ны бед, болезней и скорбей молитвами вашими избавите, да сподобившися во Царствии Небесном зрети безсмертнаго Господа Иисуса, с вами вкупе воспоем Ему: Аллилуиа.

**(Этот кондак читается трижды, затем икос 1 и кондак 1)**